

Nakorsaatinik piniartarneq passussisarnerlu pillugit Namminersornerullutik Oqartussat nalunaarutaat

Nakorsaatit pillugit inatsisartut peqqussutaanni nr. 1-imi 12. maj 2005-imeersumi § 2, imm. 2, § 5, imm. 2, § 16, imm. 3, § 24, imm. 4, aamma § 25, imm. 2, naapertorlugit aalajangersarneqarput:

Atuuffissaat

§ 1. Nakorsatinut uninngasuutitanut tamanut tunngasuni nalunaarut atorneqassaaq.

Nassuaatit

§ 2. Nakorsaatit uninngasuutitat tassaapput nakorsaatit aalajangersimasumik uninngasuutigineqartut peqqinnissaqarfimmi sulisunut, uumasut nakorsaannut, napparsimasunut, uumasutilinnut, niuertarfinnut nakorsaatinik tuniniaasartunut imaluunniit nakorsaatinik uninngasuutilinnut allanut tunniunneqartartut. Ikiueeqqaarnermi atortut nakorsaatinik nakorsamit allagartamik peqqaarani pisiarineqarsinnaasunik imallit kiisalu nakorsaatit napparsimasut, uumasuutillit imaluunniit angerlarsimaffit namminneq pigisaat nalunaarut una malillugu nakorsaatit uninngasuutitatut isigineqassangillat.

Imm. 2. Nakorsaatinik piniartarnerit tassaapput nakorsaatinik qinusarnerit, Nunatta nakorsaataasivianit, nakorsaatinik uninngasuutitassatut nakorsaasiortut qullersaata innersuussimasaanit imaluunniit nakorsaatinik pilersuisumit akuerineqarsimasumit nakorsaatit piniarneqartut.

Imm. 3. Nakorsaatinik piniartoq tassaavoq peqqissaaveqarfik imaluunniit napparsimmavimmi immikkoortortaq, peqqissaanermik suliaqartoq namminersortoq, uumasut nakorsaat imaluunniit niuertarfik nakorsaatinik tuniniaasartoq sinnerlugu nakorsatinut akisussaasutitaasoq.

Imm. 4. Nakorsaatinik inniminniisoq tassaavoq inuk sulinerminut atatillugu suliffiup nakorsaataatissaanik piniartoq.

Nakorsatinut uninngasuutitanut aamma taakku passunnerannut akisussaaneq

§ 3. Suliffeqarfinnut il.il. nakorsaatinik uninngasuutitalinnut akisussaanerpaaq nakorsatinut akisussaasuuussusamik toqqaassaaq, taassumalu nakorsaatit eqqortumik passunnissaat isumagissavaa.

§ 4. Nakorsatinut akisussasutut toqqarneqarsinnaapput nakorsat, nakorsaasiortut imaluunniit nakorsaatilerisut. Taakkuttaaq saniatigut peqqissaanermi suliallit allat imaluunniit uumasut nakorsaat toqqarneqarsinnaapput, taakku suliassamittut akuerisaaffimmik iluanni nakorsaatinik pineqartunik nakorsaasisussatut akuerineqarsimappata.

Imm. 2. Niuertarfinni nakorsaatinik tuniniaaviusartuni nakorsatinut akisussaasoq tassaavoq nakorsaatinik pisiarineqarsinnaasunik tuniniaanissamut passussinissamullu akuerisaasimasoq.

Imm. 3. Dronning Ingridip Napparsimmavissuani nakorsatinut uninngasuutitanut taakkulu

passunnissaannut akisussaasoq tassaavoq napparsimmavimmi immikkoortortami nakorsaaneq aqutsisoq, tassa allamik nakorsaatinut akisussaasumik toqqaasoqarsimanngikkaangat.

§ 5. Nakorsaatinut akisussaasoq sulisumik/ikiortimik suliamut piukkunnartumik nakorsaatinik passussisussamik toqqaasinnaavoq. Taamaattoqartillugu suliamik tigusisussap ilinniartinnissaa ilitsersuunnissaalu kiisalu suliap eqqortumik suliarineqarnissaa nakorsaatinut akisussaasup isumagissavaa.
Imm. 2. Kialuunniit nakorsaatinik passussinissamut suliassinneqarsimasup malittarisassat tassunga tunngassuteqartut ilisimassavai.

Nakorsaatinik piniartarneq

§ 6. Nakorsaatinik piniartarneq Nunatta nakorsaataasiviata immersugassaatai atorlugit allakkatigut, imaluunniit piniarfissat qarasaasiakkut atugassiat nakorsaasiortut quillersaannit akuerisaasut atorlugit pisassaaq.

Imm. 2. Nakorsaatinik piniarnerit tamarmik ataasiaannarluni piniarnerupput.

Imm. 3. Allakkatigut piniarnerit inniminniisup atsiorsimasussaavai.

§ 7. Nakorsaatinik piniartartussaq tassaavoq nakorsaatinut akisussaatitaasoq, taamaattoq §§ 8, 9 aamma 10 naapertorlugit allatut pisoqarsinnaavoq. Ikiorti taamaallaat piniarsinnaatitaavoq nakorsaasiortut quillersaannit taamaasiornissamut namminerpiaq akuerineqareersimaguni, taamaattoq tak. imm. 2.

Imm. 2. Nakorsaatit nalunaarutigineqartussaatitaasut taamaallaat nakorsaatinut akisussaasumit namminermit piniarneqarsinnaapput.

§ 8. Nakorsaatinik nakorsap allagartaliineratigut taamaallaat tunniunneqarsinnaasunik, malittarisassat malillugit pingitsooratik angallatip nakorsaataasiviani pigineqartussaasunik angallatit naalagaat angallatinillu piginnittut allakkatigut piniarsinnaapput.

§ 9. Annanniusiortartut kiisalu annanniutinik misissuisarfanni pisortat nakorsaatinik nakorsap allagartaliineratigut taamaallaat tunniunneqarsinnaasunik, malittarisassat malillugit annanniutiittussanik allakkatigut piniarsinnaapput, nakorsaatileriffimmit akuersisummiq peqarnertik takutissinnaaguniku.

Imm. 2. Nakorsaatinik piniarnerni annanniutit sananeqarfiat normuallu allassimassapput.

§ 10. Suliffeqarfanni svejseriffiusartuni pisortat isinut tarnutinik cinchocain 0,5 pct.-imik imalinnik ataasiarluni atugassanik piniarsinnaapput.

Imm. 2. Taakkuninnga piniarneq immersugassat Sullivinnik Nakkutilliivimmit immikkut sanaat atorlugit pisassaaq.

§ 11. Nakorsaatinik piniarnermi allattukkat eqqortumik suliarineqarsimanngippata, tamanna nakorsaatinik piniartup saaffigineratigut aaqqinniarneqassaaq. Kukkunerusinnaasut amigaataasinnaasulluunniit aaqqinnissaat ajornarpal, nakorsaatinik piniarluni qinnuteqaat suliarineqarsinnaanngilaq, makkuninnga pisoqartinnagu

1) nakorsaammik piniarneq suliarineqanngippat napparsimasup passunnissaata kinguartinneqarnerata kingunerisaanik napparsimasup nakorsaat pinngikkuniuk peqqissutsimigt annertuumik akornusernissaa ilimagineqarpat, imaluunniit

2) qularutissaanngitsumik ersippat nakorsaatinik piniartup suna piniarlugu kissaatigisimaneraa.

Imm. 2. Nassiussisup imm. 1 naapertorlugu sulinini upernarsassavaa.

§ 12. Nakorsaatinik nassiussinnginnermi nassiussiviup aqqa, ulloq suliarineqarfia nassiussisullu aqqa, suliffia atsiorneralu ersissapput, kiisalu §§ 8 aamma 9 naapertorlugit tunniussisoqartillugu angallatit

nakorsaatinik pilersorneqarnissaannik piumasaqaataajunnartut pillugit malittarisassat malinneqarnerat ersersinneqarsimassalluni.

Nakorsaatit paarineqarnerat

§ 13. Nakorsaatit tiguneqarnerminni poorisaminniitinneqassapput, malittarisassat matumaniittut naapertorlugit poortoqqinnejqarsimangikkunik.

§ 14. Nakorsaatit susassaqanngitsunit tiguneqarsinnaajunnaarlugit paarineqassapput.

Imm. 2. Nakorsaatit nalunaarutigineqartussaatitaasut parnaarullugit nakorsatinillu allanit immikkoortillugit paarineqassapput.

Nakorsatinik poortueqqittarneq

§ 15. Nakorsaatit bakteriaajagaanngitsut kisimik poortoqqinnejqarsinnaapput, taakku ataasiarluni pisassatut poortorneqarsimappata, soorlu iisartakkat, nakorsaatit sequtsikkat qallikkat assigaallu.

Imm. 2. Nakorsaatit taamaallaat poortoqqinnejqarsinnaapput katsorsaasup ilitsersuinera malillugu napparsimasup nammineq nakorsaasersornissaanut atugassaappata.

Imm. 3. Taamaattorli napparsimmaviit qaammatit arfnillit ingerlaneranni atugassanik nakorsatinik ataatsikkut poortueqqittarsinnaapput, pissutsit immikkorluinnaq ittut tamaaliornissaq pisariaqalersissimappassuk.

§ 16. Nakorsaatit poortoqqitat paasissutissanik ersarissunik atuaruminartunillu makkuninnga allattuiffigineqarsimassapput:

- 1) nakorsaatip taaguutaa,
- 2) nakorsaatip qanoq ittuunera,
- 3) sakkortussusia,
- 4) amerlassusii,
- 5) ulloq poortueqqiffik,
- 6) ulloq pisoqaliffissaq, aamma
- 7) qanoq ililluni nakorsaatip atornissaanik ilitsersuut ilanngunnejqarsinnaavoq

Imm. 2. Nakorsaatit kingusinnerusukkut tunniussassanngorlugit poortoqqinnerini, poortoqqitat tamaasa immikkut allattuivigineqassapput nakorsaatip poortoqqinnejqartup aqqanik normuanillu, kiisalu poortukkat imaasa amerlassusii, ulloq immiiffik kiisalu poortueqqiisup atsiornera allassimassallutik.

§ 17. Nakorsaatit puui imaarneqarsimasut tassungalu peqatigitillugu immerneqarlutillu allagartalersorneqarsimasut ataatsimoortillugit nakorsaatinit ulluinnarni atortakkanit immikkoortillugit inissinneqassapput, nakorsatinut akisussaasup akuersinissaata tungaanut.

§ 18. Nakorsatinut akisussaasup poortueqqissimaneq misissoqqissaassavaa allattuiffimmilu atsiornermigut akuerissallugu.

Imm. 2. Poortueqqinnermi nakorsatinut akisussaasoq peqataasimappat poortueqqissimaneq sulisumit allamit akuerineqassaaq.

Nakorsatinik tunniussisarneq

§ 19. Nakorsaatit nakorsap allagartaliineratigut taamaallaat tunniunnejqarsinnaasut, innersuussisuunngitsumit taamaallaat tunniunnejqarsinnaapput, nakorsasiineq nakorsasiussanut allagartamut nakorsatissanulluunniit allagartaq eqqortumik uppernarsarnejqarsimappat, tak. nakorsaatit

pillugit peqqussummi § 16, imm. 2.

Imm. 2. Nakorsaatinik tunniussisup tunniussineq nakorsasiussanut allagartamut nakorsatissanulluunniit allagartamut allassavaa, nakorsaatip taaguuta, amerlassusaat/annertussusaat sakkorsussusaallu kiisalu sumit tunniunneqarnera, ulloq tunniussivik tunniussinerullu kimit suliarineqarnera ilanngullugit.

Nakorsasiussanut allagartat imaluunniit nakorsatissanut nakorsap allagartaliinera qarasaasiaq atorlugu ingerlanneqartarpata paasissutissat qarasaasiakkut allanneqassapput.

Imm. 3. Nakorsasiussanut allagartat aamma nakorsaatinut nakorsap allagartaliinera pappiaqqat atorlugit ingerlanneqartut tunniussisumit atsiorneqartassapput.

§ 20. Nakorsaatit nakorsap allagartaliineratigut taamaallaat tunniunneqarsinnaasut napparsimasumut tunniuneqaleraangata nakorsaatit allagartannguamik ikkussivigineqartassapput paasissutissanik makkuninnga imaqtumik:

- 1) napparsimasup aqqa,
- 2) ulloq tunniussivik,
- 3) atuinissamut ilitsersuut napparsimasumit paasuminartoq,
- 4) ulloq nakorsaatip pisoqaliffisaa, kiisalu
- 5) kina nakorsaammik tunisisuunersoq.

Imm. 2. Paasissutissat imm. 1 naapertorlugu nakorsaatit puuisa qaavinut allattorneqarsinnaanngippata, taava allattukkat immikkut poorlugit nakorsammut ilanngullugit tunniunneqartassapput imaluunniit nakorsammut isumannaatsumik ikkunneqartassallutik.

§ 21. Nakorsaatit nakorsap allagartaliineratigut taamaallaat tunniunneqarsinnaasut nakorsaatinit uninngasuutitanit napparsimasunut tunniussisoqarnissaata piareersarnerani imaluunniit tunniussinermi, nakorsaatinut akisussaasup sulinermi malittarisassat ileqqussallu aaqqissussavai illersorneqarsinnaasumik nakkutigineqarnissaat isumannaatsuunissaallu anguniarlugu,

- 1) nakorsaatit nakorsamit allagartalikkat tunniunneqartut naammattumik eqqortumillu nakorsasiussat allagartaannut imaluunniit nakorsap allagartaliussaanut upernarsarneqarsimanissaat, aamma
- 2) nakorsaatit nakorsamit allagartalikkat tunniunneqarneranni nakorsatillu allagartalerneqarneranni nakorsatissiinermi ilitsersuutigineqartut nalunaarummilu matumani malittarisassat malinneqarnissaat.

§ 22. Kinaluunniit nakorsaatinik tunniussinermi peqataasoq kukkunnginnissamut maligassaq § 21-mi taaneqartoq malissallugu pisussaavoq.

Imm. 2. Tunniussineq nakorsamit, nakorsaasiortumit imaluunniit nakorsatilerisumit suliarineqarpat aamma taakku pisussaapput makku kukkunersiussallugit,

- 1) nakorsaatip sakkortussusaa, amerlassusernera/annertussusernera sumullu atornissaa eqqortumik nalilerneqarsimanersoq kiisalu apeqqutaajunnartut paatsuuvisinnaanermik akissusiisut isumannaarsimanissat, aamma

- 2) nakorsaatip atornissaanut il.il. napparsimasup pisariaqartitsinini naapertorlugu ilitsersunneqarsimanissaa.

Imm. 3. Imm. 2-mi kukkunersiusaatitaaneq aamma peqqissaanermut suliaqartunut allanut atuuppoq, suliassatut akuerisaaffimi nakorsaasersuisinnaatitaaffiup iluani.

Uppernarsaanissamut pisussaaffit

§ 23. Nakorsaatinik piniarnerit kiisalu § 11, imm. 2 naapertorlugu upernarsaatit suliarinninnerup kingorna sivikinnepaamik ukiuni pingasuni suliarinniffimmi toqqortarineqassapput.

§ 24. Nakorsaatinik tunniussisimanermut uppernarsaatit § 22 malillugu kukkunersiuisoqarsimaneranik kiap peqataasimaneranik takussutissaasut tunniussinerup kingorna sivikinnerpaamik ukiumi ataatsimi takuneqarsinnaanissaat nakorsaatinut akisussaasup isumagissavaa.

Nakorsaatinik uninngasuutitanik il.il. nakkutiginninneq

§ 25. Nakorsaatit pillugit peqqusummi § 25, imm. 2, oqaaseqatigiit aappaat malillugit eqqartuussisumit akuersisummik peqqaanngikkaluarluni nakorsaasiortut qullersaat nakorsaataasivinnut, pisiniarfinnut assigisaannullu isersinnaatitaavoq nakorsaatit pigineqartut misissoriartorlugit. Nakorsaatinut akisussaasoq pisussaavoq misissuinermi pisariaqarfiatigut ikuutissalluni.

Imm. 2. Nakorsaasiortut qullersaat misissuinermini nakorsaatinik suujunnaarsitseqqusisinnavoq:

- 1) ulloq nakorsaatit pisoqaliffiat qaangerneqarsimappat,
- 2) nakorsaatit qalipaatisarinngisaminnik qalipaateqalersimappata imaluunniit imerpalaasut peruoqalersimappata, imaluunniit
- 3) nakorsaatit allagartaat puiluunniit ima ajoqusertigisimappata imaasa suuneri pitsaassusiilu nalornissutaasinnaalerlutik.

Imm. 3. Nakorsaatit suujunnaarsinneqarneranni aningaasartuutaajumaartussat nakorsaatinik uninngasuutilip aningaasartutigissavai.

§ 26. Allattukkat nalunaarut una malillugu pigineqartussat tamaasa kiisalu naatsorsuuserinermut tunngasut suliamillu suliarinninnermi malitassat nakorsaatinut uninngasuutitanut tunngasut nakorsaasiortut qullersaata takujumassinaavai, taamaaliornissamut eqqartuussisumit akuersisummik takutitsinermigut.

§ 27. Nakorsaasiortut qullersaata ilisimaleruniuk malittarisassat atuuttut unioqqutillugit nakorsaatit passunneqartut, nakorsaatinut akisussaasoq tamatuminnga nalunaarfigisussaavaa pitsangorsaaniarnermilu siunnersuissalluni.

§ 28. Nakorsaasiortut qullersaata nakorsaatit pillugit inatsisit unioqqutinneqartut ilisimaleruniuk imaluunniit pissutsit allat pillugit ilisimasaqaleruni pisariaqanngitsumik kinguarsaanani Peqqinnissakkut Nakkutilliisoqarfik nalunaarfigissavaa, tassa nalilerneqarsinnaappat nalinginnaasumik imalunniit pisumi aalajangersimasumi ataatsimi ima pisoqarnissaa aarlerinartoqartoq

- 1) inuit imaluunniit uumasut peqqissusaat ajoquserneqarsinnaasoq, imaluunniit
- 2) nakorsaatit uninngasuutit susassaqanngitsunit iserfigineqarsinnaappata.

§ 29. Nakorsaasiortut qullersaata nakorsaatit pillugit inatsisit unioqqutinneqartut ilisimaleruniuk imaluunniit pissutsit allat ilisimasaqarfigilerunigit, pisariaqanngitsumik kinguarsaanani uumasuutinut atugaritinneqartut pillugit naalakkersuisoqarfik nalunaarfigissavaa, tassa nalilerneqarsinnaappat nalinginnaasumik imalunniit pisumi aalajangersimasumi ataatsimi nerisassat isumannaatsuunissaannut uumasulluunniit ajunngitsumik pineqartussaanerannut tunngatillugu aarlerinartoqartoq.

Pineqaatissiisarnerit

§ 30. § 3, § 5, imm. 1, oqaaseqatigiit aappaat, §§ 6 aamma 7, §§ 11-14, § 15, imm. 1 aamma 2, §§ 16-20 aamma §§ 22 aamma 24 unioqqutinneqarpata akiliisitsinermik pineqaatissiisoqarsinnaavoq.

Atuutilerfia

§ 31. Nalunaarut atuutilerpoq 1. januar 2006.

Namminersornerullutik Oqartussat, ulloq 14. november 2005

Asii Chemnitz Narup

/

Søren Rendal

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut